



Na osnovu člana 13. Zakona o principima lokalne samouprave u Federaciji Bosne i Hercegovine („Službene novine Federacije BiH“, broj: 49/06 i 51/09), člana 171. Zakona o socijalnoj zaštiti, zaštiti civilnih žrtava rata i zaštiti porodice sa djecom („Službene novine Kantona Sarajevo“, broj 38/14- prečišćeni tekst, 38/16, 44/17, 28/18, 52/21, 40/22 i 13/25), člana 19. stav 1. tačka 4. i 141. stav 3. Statuta Općine Novo Sarajevo („Službene novine Kantona Sarajevo“ broj: 5/20- prečišćeni tekst i 20/20 -ispravka), i člana 16. stav 2. tačka f) Odluke o izvršavanju Budžeta Općine Novo Sarajevo za 2026. godinu („Službene novine Kantona Sarajevo“ br: 1/26 i 17/26), Općinsko vijeće Novo Sarajevo na 14. redovnoj sjednici, održanoj dana 30.06.2026. godine, donijelo je

**ODLUKU
O DODJELI JEDNOKRATNE NOVČANE POMOĆI PORODICAMA SA TROJE I VIŠE
DJECE NA PODRUČJU OPĆINE NOVO SARAJEVO**

**Član 1.
(Predmet)**

Ovom Odlukom utvrđuje se postupak, uslov i način dodjele jednokratne novčane pomoći porodicama sa troje i više djece na području općine Novo Sarajevo (u daljem tekstu jednokratne pomoći).

**Član 2.
(Gramatička terminologija)**

Gramatička terminologija korištenja muškog ili ženskog spola podrazumijeva uključivanje oba spola.

**Član 3.
(Cilj dodjele pomoći)**

Cilj dodjele jednokratne novčane pomoći je pružanje finansijske podrške porodicama sa troje i više djece radi unapređenja životnog standarda, olakšavanje pristupa obrazovanju djece, te jačanje socijalnog položaja višečlane porodice.

**Član 4.
(Izvor sredstava)**

Novčana sredstva za dodjelu jednokratne pomoći obezbjeđuju se u Budžetu Općine Novo Sarajevo za tekuću budžetsku godinu, a u skladu sa finansijskim mogućnostima.

**Član 5.
(Korisnici)**

Pravo na jednokratnu pomoć imaju porodice koje ispunjavaju sljedeće uslove:

- a) da u zajedničkom domaćinstvu živi troje ili više djece (bračne, vanbračne, usvojene, pod starateljstvom ili djece iz predhodnog braka supružnika) do 18 godina života, a najkasnije do navršanih 27 godina ukoliko se nalaze na redovnom školovanju u Bosni i Hercegovini;
- b) da su roditelji/staratelji i djeca državljani Bosne i Hercegovine sa prijavljenim prebivalištem na području općine Novo Sarajevo najmanje godinu dana prije podnošenja zahtjeva;
- c) ako drugi roditelj, koji nije podnosilac zahtjeva, ima prijavljeno prebivalište na području druge jedinice lokalne samouprave na području Bosne i Hercegovine nije ostvario novčanu pomoć u mjestu prebivališta po istom osnovu.

Član 6.
(Uslovi za dodjelu)

Uslovi za ostvarivanje prava na dodjelu jednokratne pomoći po ovoj Odluci su:

- a) troje i više djece koje se nalazi na redovnom školovanju;
- b) da djeca nisu stupila u brak, niti stekla potomstvo;
- c) da žive u zajedničkom domaćinstvu sa roditeljima, odnosno starateljima.

Član 7.
(Postupak dodjele sredstava)

Novčana sredstva iz člana 4. ove Odluke dodjeljivati će se na osnovu podnesenih prijava na Javni poziv koji raspisuje Općinski načelnik, a koji se objavljuje na web stranici i oglasnoj ploči Općine i ostaje otvoren do kraja tekuće budžetske godine, odnosno do utroška planiranih sredstava za tekuću godinu.

Član 8.
(Sadržaj Javnog poziva)

Javni poziv treba da sadrži sljedeće elemente:

- a) naziv organa koji raspisuje Javni poziv,
- b) predmet Javnog poziva, odnosno svrhu i namjenu sredstava koja su predmet dodjele,
- c) ukupna finansijska sredstva potrebna za provođenje Javnog poziva,
- d) uslovi koje podnosioci prijave moraju ispunjavati kako bi ostvarili pravo na dodjelu novčanih sredstava u skladu sa Javnim pozivom,
- e) vremenski period za koji se Javni poziv raspisuje,
- f) obavezna dokumentaciju koju je potrebno priložiti uz prijavu, kao i forma i način dostavljanja prijave, rok za podnošenje prijave, bitne napomene, uključujući upute o načinu podnošenja prijave (lično, poštom), kontakt podatke podnosioca prijave, napomenu o neprihvatanju nepotpunih i neblagovremenih prijava, kao i informacije o postupku razmatranja i donošenja odluke.

Član 9.
(Visina jednokratne pomoći)

- (1) Visina jednokratne pomoći iznosi 1.000,00 KM po porodici.
- (2) Iznos pomoći je jednak za svaku porodicu koja ispunjava uslove.

Član 10.
(Postupak ostvarivanja prava)

- (1) Prijave sa potpunom dokumentacijom za ostvarivanje prava podnose se Komisiji za razmatranje prijava za dodjelu jednokratne novčane pomoći porodicama sa troje i više djece sa područja Općine Novo Sarajevo (u daljem tekstu Komisija) putem Službe za socijalna pitanja, zdravstvo, izbjeglice i raseljena lica (u daljem tekstu Služba), a predaju se na Protokol Općine Novo Sarajevo.
- (2) U svrhu rješavanja podnesenih prijava Općinski načelnik imenuje Komisiju za razmatranje, a koja se sastoji od tri člana, jednog zamjenskog člana i sekretara.
- (3) Za potrebe Komisije Služba obavlja administrativno-tehničke poslove.
- (4) Dokumentacija koju je potrebno priložiti uz prijavu po objavljenom Javnom pozivu bit će navedena u posebnom obrascu koji će biti sastavni dio Javnog poziva.
- (5) Komisija će kontinuirano prema redosljedu zaprimljenih prijava po Javnom pozivu nakon uvida u priloženu dokumentaciju i utvrđivanja ispunjavanja uslova za dodjelu novčanih sredstava, dostaviti Općinskom načelniku Prijedlog za dodjelu novčanih sredstava, na osnovu kojeg će Općinski načelnik putem Službe donijeti Zaključak o odobravanju isplate sredstava.

Općina Novo Sarajevo, ulica Zmaja od Bosne br. 55, centrala telefon (387 33) 492 100

Općinsko vijeće Novo Sarajevo

tel: (387 33) 492 268, fax: (387 33) 650 397, email: vijece@novosarajevo.ba

Identifikacioni broj: 4200558710008 PDV broj: 200558710008 Porezni broj: 0170333000

Depozitni račun 1411965320011288 Bosna Bank International d.d



- (6) Prijave za koje Komisija utvrdi da ne ispunjavaju propisane uslove, kao i prijave podnesene nakon utroška sredstava, bit će odbijene o čemu će Služba obavijestiti podnosioca prijave pismenim putem.
- (7) Služba će pismenim putem obavijestiti i podnosioca prijave koji su ostvarili pravo na novčanu pomoć.
- (8) Podnesene prijave važe samo za budžetsku godinu u kojoj je prijava podnesena.
- (9) Pravo na jednokratnu novčanu pomoć može se ostvariti samo jednom u toku kalendarske godine.

Član 11.
(Isplata novčanih sredstava)

- (1) Isplata jednokratne pomoći vršit će se uplatom na transakcijski račun podnosioca prijave putem Službe za privredu, budžet i finansije.
- (2) O realizaciji sredstava, po odredbama ove Odluke, Općinski načelnik informiše Općinsko vijeće jednom godišnje.

Član 12.
(Stupanje Odluke na snagu)

Ova Odluka stupa na snagu osmog dana od dana objavljivanja u "Službenim novinama Kantona Sarajevo".

Broj: 02OV-01-1-6585/26
Sarajevo, 30.06.2026. godine



